

Qaqortorsuarmi Anorthositeqarfimmik atuinissamik akuersissut pillugu Hudson Resourcesip qinnuteqaataanut tunngatillugu ulluni 8.-10. maj 2015-imi Qeqqata Kommuniani innuttaasut ataatsimiisinnerinit apeqqutit akissutillu

Itillimi innuttaasunik ataatsimiisitsineq

9. maj 2015-imi

Aqqaneq-marluk missaat takkupput

Inersuarmit apeqqutit

Elias Dahl:

Suliffeqarnermut tunngatillugu, uagut qanoq ililluta Itillimiit aatsitassarsiorfimmi suliffinnut qinnuteqarsinnaavugut? Ilinniagaqarsimangitsunut sunik periarfissaqarpa?

Hudson Resourcesimit Rune Keiler:

Sungiusarnermik ingerlassaqassaagut, taamaattumik Sisimiuni Aatsitassalerinermik Ilinniarfik suleqatigaarput. Maskiinanik assaassutinik assigisaanilluunniit misilittagaqaraanni qanoq piginnaaneqarnerluni takutinniarlugu misilitsinneeraq aqquusaagassaavoq. Maskinamilli nakkutiginnittut aamma atorfeqassaaq. Nakkutilliisoqartariaqarpoq, ujaqqallu sequtserfiini saliisoqartartussaalluni. Aamma eqqiluisaarisartut sunillu tamanik isumaginnittartut pisariaqartissavagut. Atorfinnut taama ittunut gymnasiami ilinniarsimanermik piunasaqanngilagut. Inuit suleqatigiikkuttaani sulisinnaanerit, aammalu asimi tinnaaleratik inooqatigiissinnaanerit pingaarutittupilussuarput.

Inuussutissarsiornermut, Suliffeqarnermut, Niuernermit Nunanullu Allanut Tunngasunut Naalackersuisoq Vittus Qujaukitsoq:

Naalackersuisoqarfimmi pisortaata oqaatigisaa ilassutigisinnaavara. Qeqqata Kommuniani pikkorissartitsinerni sulisartuusinnaasut peqataalersinniarlugit iliuseqassaaq. Kommune suleqatigalugu sunik susoqassanera pilersarusiussavarput. Misissugassat suliaassarfiit ilaat tassaavoq Hudson Resources sulisartunik pissarsiornialerpat kikkut sulisinnaanerisa misissornissaat. Tamanna Namminersorlutik Oqartussat aamma kommunip akornanni qanimut suleqatigiilluni pissaq.

Borgmesteri Hermann Berthelsen:

Kommunimi innuttaasut sulisartut atorneqarnissaat assut pingaartuuvoq. Kommunimeersuunngikkunimmi kommunimut akileraarutinik akiliissanngillat. Taamaattumik kommunimi innuttaasunut aatsitassarsiorfimmi suliffiit kajungernartuunissaasa qularnaarnissaat iliuseqarfigissavarput.

Jens Martin Beck:

Maskiinanik ingerlatsisooreeraanni taava atorfinitsitaanissamut periarfissaqartoqassava?

Qaqortorsuarmi Anorthositeqarfimmik atuinissamik akuersissut pillugu Hudson Resourcesip qinnuteqaataanut tunngatillugu ulluni 8.-10. maj 2015-imi Qeqqata Kommunianni innuttaasut ataatsimiisinnerinit apeqqutit akissutillu

Hudson Resourcesimit Rune Keiler:

Aatsitassarsiorfiup aallartinnissaa qanilligutsigu suliffinnut inuttaligassanut pissarsiarisinnaasanut tullerriaakkamik allattuiffiliussaagut. Maskiinanik ingerlatsisartut misilitsissapput. Dumperit sivingasukkoortassapput, taamaattumillu bremse atornagu retræterimik ingerlatinneqassapput. Taamaattumik qanoq atornissaat ilinniarneqassaaq. Angusigaanni maanngaanniit kommunimilu sumiiffinnit allanit atorfinitsitaqarniarneq ajornaquteqanngitsutut isigaara. Kommunimeersut pingaarnersiortussaavagut.

Borgmesteri Hermann Berthelsen:

Ippassaq Kangaamiuniikkatta pisunniarnikkut assut ajornakusoortitsivunga, taamaattumillu angallattariaqarpaannga. Taamaattumik sungiusarneq aallartereerpaat. Arlaannaalluunniit nalikinnerusutut misigissanngilaq. Sungiusaraannili pitsaanerulersoqartarpoq, taamaattumik arlaanni aallartittariaqarpoq.

Pinngortitamut, Avatangiisinut Inatsisinillu Atuutsitsinermut Naalakkersuisoq Mala Høy Kúko:

Innuttaasut ataatsimiisinnerini isumannaallisaaneq pissutigalugu tuluttut oqalussinnaasariaqarneq annertuumik oqaluuserineqarsimavoq.

Hudson Resourcesimit Rune Keiler:

Aatsitassarsiorfimmik oqaatsinik ilinniartitsineq aallartissarniarparput, danskisut imaluunniit tuluttut, immaqalu uanga kalaallisut ilinniarniassaanga.

Borgmesteri Hermann Berthelsen:

Soorunami tuluttut oqalussinnaanngikkaanni tamanna unitsitsissutaassanngilaq.

Isumannaallisaanermulli tunngatillugu pingaaruteqassaaq. Tamannali unitsitsissutaassanngilaq, ilinniarneqarsinnaavormi.

IBA-mik isumaqatigiissut sianigisariaqassavarsi, taannami najugaqarfimmeersunut iluaqusersuissaaq. Qeqertarsuatsiaani nunaqarfimmi atorneqarsinnaasunik aningaasaateqarfiliortoqarsimavoq, taamaattumik maani Itillimi iluaqutissat sorliit pissarsiarisinnaasasi isumaliutigissavasi. Ilissi suut atorfissaqartinnerisi ilisimanerpaavarsi, taamaattumik ataasinngornermi aallartereerlusi eqqarsaatigilerniarsiuk. Qeqertarsuatsiaanit misilittagaasut atortariaqarpagut, pitsaanerulersillugillu. Amigaateqarussi naatsorsuutigisassanngorarlusi iliuuseqartariaqarpusi. Tamanna tassaavoq inassutigisaaq.

Pinngortitamut, Avatangiisinut Inatsisinillu Atuutsitsinermut Naalakkersuisoq Mala Høy Kúko:

Kangaamiuni Maniitsumilu innuttaasut oqaluuseraat aatsitassarsiorfimmik nunatsinni atortussiassanik pilersuisoqassasoq, nunatsinnit sulisartoqartussaammat. Ilissi aamma aatsitassarsiorfimmik nunatsinnut atortussiassanik pilersuinissarsi inassutigerusuppara.

Qaqortorsuarmi Anorthositeqarfimmik atuinissamik akuersissut pillugu Hudson Resourcesip qinnuteqaataanut tunngatillugu ulluni 8.-10. maj 2015-imi Qeqqata Kommunioni innuttaasut ataatsimiisinnerinit apeqqutit akissutillu

Elias Dahl:

Saqqummiussisut arlaannut apeqqut. Ullumikkut pilersuinermi Sisimiuliartilluni Itilleq aqqusaarneqartarpoq. Aatsitassarsiorfimmulli Sisimiunit Itilleq aqqusaarlugu qaninnerugaluarpog. Aqqummi tassani pilersuisoqarnermut periarfissaqassanerluni?

Hudson Resourcesimit Rune Keiler:

Inuit nikittarlutik sulisut Maniitsumeersuunissaat, Sisimiuneersuunissaat, Kangaamiuneersuunissaat maanngaanneersuunissaallu piuvavagut, taamaattumillu maanngaanniit angallatit atussavagut. Assersuutigalugu aalisagaq Itillimit nassarsinnaavaat, taamaalillusi aatsitassarsiarfimmut aqqut tamaat angalasariaqarnagu. Tamanna ilissinnut akikinnerussaaq.

Elias Dahl:

Sumiiffimmi uumasunik misissuinerujussuit uumasooqanngingajannerannik takutitsisimanerat eqqumiippoq, tamaanimi uumasorpasuaqarpoq. Nunap ilaata tungaanut Kangerlussuarmut umimmaat ukiuni kingulliunerusuni ingerlaartarsimapput, taamaattumillu aatsitassarsiornermik suliniut erseqqissumik sunniuteqassaaq, sumiiffimmi sunniuteqassanera naatsorsuutigisinnaallutigu. Umimmannik ikinnernik pissarsisarnissarput naatsorsuutigissavarput, piniartummi tamaani umimmannik pisaqartalerput.

Ole Geertz-Hansen, Pinngortitaleriffik:

Umimmannut tunngatillugu misissuinerit ilisimasagut sumiiffimmi amerlasoorsuaqanngitsoq takutippaat, ilisimasatinni nalunaarutigisarnissaat pingaartuuvoq, taamaalillutik tamakku nalunaarsorneqarsinnaassammata.

Hudson Resourcesimit Rune Keiler:

Aasaanerini marlunni affarmilu umimmammik ataatsimik takusaqarpugut.

Pinngortitamut, Avatangiisinut Inatsisinillu Atuutsitsinermut Naalackersuisoq Mala Høy Kúko:

Takusaqarussi imaluunniit tusagaqarussi ilisimasassinnik paasissutissiisarnissarsi pingaartuuvoq, taamaalilluni taamaattoqarneranik uppersaasoqassamat.

Borgmesteri Hermann Berthelsen:

Piniartut nalunaarutigisaat aallaavigalugu Pinngortitaleriffik misissuisimavoq. Piniartut namminneq nalunaarutigisaat aallaavigalugu ilisimatusarnermik suliaqartuupput.

Elias Dahl:

Qaqortorsuarmi Anorthositeqarfimmik atuinissamik akuersissut pillugu Hudson Resourcesip qinnuteqaataanut tunngatillugu ulluni 8.-10. maj 2015-imi Qeqqata Kommunianni innuttaasut ataatsimiisinnerinit apeqqutit akissutillu

Aatsitassarsiorfimmit eqqaavigisamit tatsimit imeq kangerlutsinnut kuuttassaaq. Oqaatigineqaraluarpoq sunniutaasoq annikitsuinnaassasoq, kuulli eqalunniartarfitta ilagaa, taamaattumik siunissami eqaluit qanoq pissaneri eqqarsariarnarpoq.

Ole Geertz-Hansen, Pinnngortitaleriffik:

Tasermi sumiiffimmilu sunniutaasussat naatsorsuiffigineqarput. Naatsorsuiffimmi isumannaallisaaffissamut annertuumik killeqartitsisoqarpoq. Aatsitassarsiorfimmit eqqakkat tatsimut inissinneqarnerannit kangerlummut apuunnissaannut ukiut arfineq-pingasut ingerlassapput.

Tukannguaq Dahl:

Mingutsitsisoqassappat eqaluit eqqorneqassapput. Eqalunnut qanoq sunniuteqassava? Tatsit imminnut atasuupput?

Ole Geertz-Hansen, Pinnngortitaleriffik:

Aatsitassarsiorfiup eqqaani tatsini eqaloqanngitsoq misissuinerit takutippaat. Taamaallaat kakilisaqarpoq.

Hudson Resourcesimit Rune Keiler:

Tasermit qorlortoq ataaseq eqalunnut portuallaarpoq. Sumiiffimmi tuttunut tunngatillugu Jim (Jim Cambon, Hudson Resourcesimi pisortap tullia) oqaluttuarpoq aatsitassarsiorfimmi nipiliorneq sungiukkunikku tamaani tuttut mangiaqqittalissasut. Canadami tuttut eqimattut allaanerujussuarnik amerlassuseqarput. Ukiut pingajuanni aatsitassarsiorfikkut tuttut 15.000-it aqqusaarput, taamaattumillu aqqusaarneranni sulinertik unitsittariaqarpaat. Sarfartuumi sivisuumik sulereerpugut. Tamaani generatori (sarfaliuut) ingerlatinneqarpoq. Taamaakkaluortoq tuttorpassuaqarpoq umimmappassuaqarlunilu. Toqqit eqqaanniikkajupput, aallaasersorfiginerlu ajoratsigit sungiuppaatigut. Isumaqarpunga aallaaseqannginnerput tuttut malugisinnaasimagaat.

Ole Geertz-Hansen, Pinnngortitaleriffik:

Alaskami aatsitassarsiorfimmut 15 km-inik ungasissuseqartumut sunniuteqartoqarpoq, taamaattumillu tamanna pillugu isummersuutit assigiinngillat.

Pinnngortitamut, Avatangiisinut Inatsisinillu Atuutsitsinermut Naalakkersuisoq Mala Høy Kúko:

Maniitsumikkatta innuttaasut oqaatigaat sunaluunniit aallartisarneqaraluarpat tamatta akisussaaffeqaqataasugut. Arlaannik naqqittarialimmik sianigisaqalerussi tamanna nalunaarutigissavarsi. Tassa ilissi akisussaaffissi.

Borgmesteri Hermann Berthelsen:

Qaqortorsuarmi Anorthositeqarfimmik atuinissamik akuersissut pillugu Hudson Resourcesip qinnuteqaataanut tunngatillugu ulluni 8.-10. maj 2015-imi Qeqqata Kommunianni innuttaasut ataatsimiisinnerinit apeqquutit akissutillu

Aatsitassarsiorfiup umiarsualiviani orsersornissamut periarfissaqassanersoq Kangaamiuneersup apeqquutigaa. Tamaaliortoqarusuppoq, taamaattumik tamaani angalanissamut assupilussuaq orsussamik nassartariaqanngilasi.

Hudson Resourcesimit Rune Keiler:

Dankortilli tigusunnaassagunanngilagut. Aggortitanik akiliisoqartassaaq, tamatumali saniatigut sumiiffimmi oqarasuaatinik angallattanik atuisoqarsinnaalersillugu attaveqarfiliortitsiniarnermik Tele Greenlandilu suleqatigiippugut. Kangerluup illua'tungaani aamma piniartunut isumannaallisaanermik annertusaassaaq. Ikiorserneqarnissarlu pisariaqartinneqassappat ikiorsiisinnaavugut. Peqqissaasumik imaluunniit napparsimasunik ikiorsiisartumik aamma sulisoqassaagut. Ikiorsiisarnikkut annikitsunnguussaagut – ajornartoornermilli atuisoqalissappat immaqa annertuumik ikiuutaasinnaassalluta.

Tukannguaq Dahl:

Pilersuisoq nioqqutissaatimini assersuutigalugu atisanik amigaateqarpoq. Niuertussat amerlanerit takkuppata pisiniarfimmuut maaniittumut amerlanerik nioqquteqalissanerluni?

Hudson Resourcesimit Rune Keiler:

Isumaqarpunga Pilersuisumut pilersuisooqataasoq KK Engros atussagipput.

Elias Dahl:

Qeqertarsuatsiaani anigaasaateqarfiit, qanoruna pilersinneqartut? Uagut maani qanoriliorsinnaavugut?

Hudson Resourcesimit Rune Keiler:

Aningaasaateqarfinnik ilinniartitaanermut, timersornermut inooqatigiinnilu aaqquissuussaasunut tunngatillugu qinnuteqarfiusinnaasunik pilersitsiniarpugut. Taakku isumaqatiginninniutaapput, taamaattumillu qanoq ilissaneri erseqqissumik oqaatigisinnaanngilarput, aningaasaateqarfinnilli taakkuninnga aqutsisoqartussaassaaq.

Inuussutissarsiornermut, Suliffeqarnermut, Niuernermut Nunanullu Allanut Tunngasunut Naalackersuisoq Vittus Qujaukitsoq:

Soorunami nunaqarfimmi maani sunik pisariaqartitsinersi nammineq aalajangissavarsi, pisariaqartitasimi Kangaamiuni, Sisimiuni, Maniitsumi Kangerlussuarmilu pisariaqartitanit allaanerusinnaapput. Taamaattumik sorlernik piumasaqarnerlusi nammineq aalajangissavarsi, taakkulu kommunimut nassiullugit. Suut piumasassat kissaatiginerlugit ilissi nammineq oqallisissaasi.

Borgmesteri Hermann Berthelsen:

Qaqortorsuarmi Anorthositeqarfimmik atuinissamik akuersissut pillugu Hudson Resourcesip qinnuteqaataanut tunngatillugu ulluni 8.-10. maj 2015-imi Qeqqata Kommuniiani innuttaasut ataatsimiisinnerinit apeqqutit akissutillu

Piffissami qaninnerpaami IBA-mik isumaqatigiisummut tunngatillugu sunik kissaateqarneri tusarniarlugu illoqarfinnut nunaqarfinnullu allagaqassaagut. Isumaqarpunga Qeqqata Kommuniata pilersarusiornerani Itilleq immikkut ittumik inissisimaffeqartoq, nunaqarfimmi aatsitassarsiorfimmut ima qanitsigisumiippoq tamatumunnga eqeersimaartoqartariaqarluni.

Tukannguaq Dahl:

Eqqissimatitsineq pillugu apeqqut. Tusarpara kangerluup qinguata eqqissimatitsiffiuniarnera. Qanoq tamanna isumaqarpa?

Pinnqortitamut, Avatangiisinut Inatsisinillu Atuutsitsinermut Naalakkersuisoq Mala Høy Kúko:

Sumiiffik Ilulissani Kangiata kangerluanisulli UNESCO-mut siunnersuutigineqarsimavoq, sumiiffimmi matuminnga susoqarnissaanik tusagaqarsimangilanga.

Borgmesteri Hermann Berthelsen:

Aalisarnermut piniarnermullu UNESCO-mut atatillugu eqqissimatitsineq equissanngilaq. Paarlattuanilli pisoqassaaq, ukiorpassuarnimi tamani sumiiffimmi qanoq aalisarnermik piniarnermillu inuussuteqarsinnaasimaneq takutinneqartussaavoq. UNESCO-mi eqqissimatitsinerit kusanartuliatut isigisassaanissaat isumaanngilaq. Siunertaq tassaavoq sumiiffiit eqqissimatitat qanoq atorneqarnerisa takutinneqarnissaat.

Elias Dahl:

Naak ungasissumiikkaluartoq tamaani taava piniartoqarsinnaassava?

Hudson Resourcesimit Rune Keiler:

Isumannaallisaanermut tunngasortaqarpoq tamanna. Maangaannaq seqqortoqartarpoq, maskiinallu angisuut atugaraagut. Taakkuli aqqusiniinnarmi ingerlapput. Kalaallit Nunaanni ukuni 13-imi suliaqarnitsinni tammaarsimaffimmi aallaasit inerteqqutaatinneqarput, taamatullu pisoqarpoq tammaarsimaffimmi ataaseq ukalertorusulermat. Taassuma ukaleq aallaginnangilaa, kisiannili tupeq. Kingornatigut tammaarsimaffimmi aallaasit inerteqqutaalerput.

Borgmesteri Hermann Berthelsen:

Akuersissuteqarnermut killissarititassi iluani piniariarfinnik atuinerup ingerlatiinnarsinnaanera apeqqutigineqarpoq.

Jørn Skov Nielsen, Inuussutissarsiornermut, Suliffeqarnermut Niuernermullu Naalakkersuisoqarfik:

Hudson Resources atuinissamut akuersissutisissappata aamma piniartarnissaq ataqqisariaqarpaat. Sumiiffimmi isumannaallisaanikkut soorunami aarleqqutissaqartoqarpoq, taamaattumillu aatsitassarsiorfik tamaani

Qaqortorsuarmi Anorthositeqarfimmik atuinissamik akuersissut pillugu Hudson Resourcesip qinnuteqaataanut tunngatillugu ulluni 8.-10. maj 2015-imi Qeqqata Kommuniiani innuttaasut ataatsimiisinnerinit apeqqutit akissutillu

aallaasersoqqusaannginnera oqaatigisinnaavaat. Kisianni, aatsitassarsiorfimmi sulisartutut piniartoqaqqusaanngilaq, najukkamili sulisartutut sunngiffimmini piniartoqarsinnaavoq.

Tukannguaq Dahl:

Aatsitassarsiorfimmuut pilersaarutit siuarnerusimalerpata piniarnermut tunngatillugu erseqqinnerusunik paasissutissarsinissara neriutigaara.